



Inuit Ataqatigiit Inatsisartuni

13. marts 2008

Inatsisartut suleriaasianni § 36 imm. 1 tunngavigalugu naalakkersuisunut ima apeqquteqaateqarpunga:

Naalakkersuisut qulakkeersimanerlugu Ivittuut kommuniata kommuninut allanut kattunneratigut Grønlandskommandop kommune najuinnarniarneraa?

Ivittuut kommuniata kommuninik allanik kattuteqateqarneratigut danskit naalakkersuisui aalajangissagaluarpata Grønlandskommandop Kangilinnguit qimallugit Danmarkimut nuunneqassasoq, taava naalakkersuisut piunassuseqarpat Danskit Illersornissamut Ministereqarfianik, Ivittuut kommunianik, KANUKOKA-mik Grønlandskommandomillu peqataaffigineqartumik, Ivittuut kommuniata immikkut aaqqiissuteqarfiginissaanik isumaqatigininniassallutik? (Inatsisartunut ilaasortaq Josef Motzfeldt)

Tunngavilersuut:

Grønlandskommando Ivittuut kommuniani angerlarsimaffeqarpoq.

Kommunip isertitaasa 90 %-ii Grønlandskommandop sulisuisa akileraarutaanneersuupput. Grønlandskommandop nunatsinni angerlarsimaffeqarneratigut Danmarkimi ministeriaqarfimmut assigiinngitsunut nunarput ersialaartinneqarluarpoq. Ministeriaqarfiit matumani nunatsinnut attuumassuteqartut makku eqqarsaatigaakk: Nunanut allanut Ministereqarfik, Statsministeriet, Finansministeriet aamma Illersornissamut Ministereqarfik.

Ivittuut kommune nunatsinni kommuninut allanut assersuunneqarsinnaangilaq, ilaatigut makku tamatumunnga uppersaatissaapput:

Sanaartukkat tamarmik kommunimit aningaasalersorneqarput Namminersorerullutik Oqartussanit tapiiffigineqanngitsumik, inunnik isumaginninnermut aningaasartuuteqanngilaq, suliffissaaleqisoqanngilaq, peqqissutsikkut isumagineqarneq nunatsinni peqqinnissaqarfimmut aningaasartuutaanngilaq, kommunini kisiartaalluni inuiaqatigiit silaannakkut angallannikkut isumagineqarnerannut 500.000 kr-nik ukiumut akileeqataasarpoq.

Kommunit kattussorniarnerat innuttaasut ajunnginnerusumik atugaqarnissaannik siunertaqartoq Ivittuut kommuniani innuttaasunut atuuttusaanngilaq. Ilaatigut tamanna pillugu kommunalbestyrelsi naalakkersuisunut attaveqartarsimagaluarpoq oqaloqatiginikkumalluni. Tamannali akuersaarumaneqartarsimanngilaq.

Kommunit kattunnerisigut Ivittuut kommuniani innuttaasut aningaasartuuteqarnerulernikkut anneruumik eqqorneqartussaapput. Pissutsilli tamakku aaqqiivigineqarsinnaanerannik kommunalbestyrelsip naalakkersuisunik oqaloqateqarniartaraluarnerata soqutigineqanngilluinnarnerata kinguneranik piffissaq kingulleq Grønlandskommandomi oqartussaasut kommunalbestyrelsimut nalunaarsimapput immikkut iluarsissutaasinaasut pillugit oqaloqatigiissinnaaneq piviusunngorsinnaanngippat Grønlandskommandop ingerlaannartumik Kangilinnguit qimassagaa inassutiginiaritsik.

Inuiaqatigiit ataatsimut isigalugit tamatuma sunniutissai annertoqaat. Nunamut tamarmut akileraarutikkut ukiumut nunap karsiata 20 mio. Kr. angullugit isertittagai annaaneqassapput. Nunaqarfik Arsuq nakorsaqaarnikkut aamma angallannikkut eqqornerlunneqartussaavoq. Ullumikkut nunaqarfik Kangilinnuani nakorsamit ullut 14-ikkaarlugit isumagineqarpoq. Qulimiguulimmik sapaatip akunnikkaartumik, kommunip aamma Grønlandskommandop akileeqataaffigisaannik, Ivittuut kommuniata tikineqartarneratigut Arsummi innuttaasut silaannakkut angallannikkut periarfissinneqarput.

Manna tikillugu Ivittuut kommunia kattunnissamut suleqataasimavoq, kommunit tallimaasut atsioqatigiillutik isumaqatigiissutigisimasaasa ilagimmasuk ullumimut kommuniusut kattutereernerup kingorna ingerlanneqareersut maannamullu kommuniusuni periarfissaasut tunngavigalugit ingerlatsisoqassasoq.

Ivittuut kommuniata ajuusaarutigisaanik kommunit kattuttussat taama atsioqatigiissimagaluarnarat atorsinnaanngitsoq piffissaq kingulleq paasinarsivoq, kattunnissaq pillugu inatsisissap aamma aqutsinermut inatsisissap tamanna ajornarsitikkaa paasineqarmat.

Ukiuni kingullerni qulini Ivittuut kommuniani innuttaasut nunap karsianut aamma kommunit akornanni naligiissaarinermut 170 mio. Kr. akilersimavaat.

Inussiarnersumik qinnutigaara apeqqummut akissut piaartumik, kingusinnerpaamillu 29. marts 2008 uannut tunniunneqareersimassasoq.